


DITUKÙ DYÀ BAAMAAMÙ

 . . .tabernacle, ki disambila dyànyì ndyôdi adi. Ncyà bushùwà ne ndi ne disànkà mu dindà emu, dyà kumònakù didyunda dyà mu nyumà dyà tabernacle ewu, ne mùshindu wùdìbi ne, cimanyinu cyàcya, bàdi pabwípì mpindyewu ne kwibaka èkèleeziyà mupyamùpyà. Ngeela meeji ne ki cìdi cìkèngediibwà. Pa kumòna ne paanyimà pàà . . .bu Mukalenge Yesù mwà kunènga, paanyimà pàà twètù aba bamanè kuya, nebiikalè ne . . .nebikengelè bwà bânà bèètù balela kwikalabò ne mwaba wà kuya mu èkèleeziyà. Nènku tudi baswè “kulwangana ne mwètù mwònsò bwà Diitabuuja dyàkapàbo bansantu musangu wùmwe cyendèlèlè.” Ngeela meeji ne aci ncintu cìmpè.

² Nènku ànu pâmvwà mbwela, kùkaadi katanci apa, bwà kusàkidilakù ku majaaniki àbùngi àkaavwà mafidiibwe pa bìdi bitàngilà dyondopa, dyà mu masangisha makesè a ndekeelu aa, ku tabernacle eku. Dìbà dyònsò bìdi ànu byàmbatangana mishiki, yà dyondopa, dyondopa dinènè dyà bishimà.

³ Mwva mushiye mukàjàànyì pambèlu, ànu mpindyewu ewu, ne bânà ku—ku ciibi; nènku kùvwa mwanèètù wa bakàjì kampànda, mmusòmbe mwaba ewu mpindyewu, ne disànkà dìyiila ne panshì mu mùshindù wà ne ùvwa ùdila ne mwadi, bwà cishimà cinènè cìvwà cyenzèkèle mwikùlwèndè wa balùme, lwà mwàmwa, ngeela meeji, mu Chattanooga. Màndàmù Nash, mwab’ewu, mwikùlwèbè wa balùme mukesè awu ùvwa ùtàcishiibwa ne disaamà, ne disangisha dyà ndekeelu mwaba ewu, Mukalenge Yesù, ngeela meeji, e kucyèla patòòke, kwamba ne: “EMU MMÙDÌ MUKALENGÈ WAMBÀ, aci, cyàmànyì kuya. Ne yèyè neùmwe bìmpè.” Nènku kakwètù aku kàkaadi ànu bìmpè byà menemene ne mubidi tumatuma, ne mubidi tumatuma ne mwèndè mwònsò.

Nènku bìdi—bìdi bitùpisha ne disànka’s, paùdi umvwa majaaniki awu.

⁴ Ki pashiishe nsongàalùmè kampànda wa citende, udi pèndè kaaba aka, kulòmbayè disambila bwà Màndàmù Stotts, udi ufùma ku dipandiibwa awu. Ne disànkishiibwa dyàbò; nwamònu’s, muntu yèyè kàyi muswè bwà twètù kumusambidila to, mòna’s wèndè . . .bìdi bìleeja, bu mùdìbi ànu ne wèwè udi uteetà, pàdì bantu baswè bwà wèwè kubàsambidila, dìbà adi bòbò, disànkishiibwa, nudi numòna’s. Misangu mikwàbò bitu bìlwa byà bibì be, mu mùshindù wà ne . . .kì byà bibì to, kàdi byàbùngì be, mu mùshindù wà bikèngela ànu ùnyeemè ùye mwaba kampànda ne wòngolokè, ne ùsokomèku ndambù, bwà kwikalakù ne mwoyi. Kàdi, ndi—ndi ne disànkà bwà mùdìbo

bènza nàнку. Kanwèdikù meeji ne ncyèna muswè kubàmòna to, bwalu piikalàbo . . . bu ne kakúvwa muntu nànsha umwe muswè bwà mmusambidilè to, mudimu wànyì wà bwambi wùvwa mufwànyine kwikala penyi? Nwamònu anyi? Nwamònu anyi?

⁵ Kàdi misangu mikwàbò paùdi wamba ne: “Mwanèètù Branham, ncyèna ngumvwa pàdi bantu bàbìikila mùshindù awu, kàdi—kàdi wèwè uswà kudifinda uya mwaba kampànda.” Bikèngela ngènzè nàнку bwà mpetèku mwà kwikala ne mwoyi, bwà kusambidila bantu. Kwèna ànu . . . Kì—kì mmwaba ànu wùmwèpelè, apa to. Mpa buloba bujimà. Nudi numòna anyi? Nènku—nènku’s mbyà makòyi a menemene. Nènku ndi mutwìshìibwe ne nudi bumvwè aci.

⁶ Kaa, mbìmpè be bwà kwikala mwena Kilstò! Ncyèna ànu mumanyè cìndi mufwànyine kwenza to bu kaciyi bwà Kilstò, ne pa nàнку . . . kàbidì kwikalakù muswikàkàne ne beena Kilstò, mu mùshindù wà ne, cisàmbà cyà Diitabuujà dyà mushinga mukolè dyà mwomùmwe, bàdi bìitabuujà Nzambi ne baMweyèmène; ne bìitabuujà ne dīngà ditùkù dyà butùmbi twadyàkujikijangana ne mvità yònsò eyi, ne netùpetè bucìmunyi, ne netwìmanè bapikula mu difwàngana Nendè, luseke lukwàbò lwàlwa.

⁷ Nènku dībà adi ndikù muswè kufila ànu kaadimanyisha kakesè cyanàànà, ne, tabernacle wìkala mwà kulwa ewu, ne bikwàbò, ndi . . . tudi tuvwiya bulongolodi bwètù bwà mfrangà bupyabùpyà, nangànangà bwànyì mèmè bwà tùmpanyè. Kacya ànu twàbanga kwenza masangisha, kacya ànu ngàbanga wòwò aa, ku luseke lwà butangadiki, kùkaadi bidimu byàbùngi, pamutù pàà kujuula bulongolodi bwà mfranga, bwà kwikala ne kasùmbù kakwàbò kàà bantu, mvwa nkwàta mudimu ànu ne kasùmbù kànkaavwà mumanyàngàne naakù; ne kuumuka ku . . . ne ngenza bulongolodi, bwà ne masangisha àànyì ònsò ikalè ènzèka mu dīnà dyà Branham Tabernacle. Ne bìvwa bìpicila ku Banque Nationale de l’Union mu New Albany, kùvwàbò bafwànyine kwikala bàfucila—bàfucila mpetu kupicila ku yèye awu, bwà kabìkàdi byà bàfucisha bitàdi to. Bu kabìyi nàнку to, mfrangà yònsò yìvwà misangisha ayi nàнку mbayìmfucishile bitàdi, bu ncìyi mukwàte mudimu ne Branham Tabernacle bu bulongolodi bwà mfrangà.

⁸ Bààbùngì bàà kunùdi bàkaadi bangumvwè mmanyisha cyòci aci, misangu ne misangu. Bikèngela ngènzè nàнку, bwà . . . bwà kwenza cyòci aci. Nènku pashìishe—pashìishe tudi tujuula bulongolodi bupyabùpyà bwà mfrangà mpindyewu. Ne tudi baswè bùngì bwònsò bwà bantu bàdi bamanyè ne mèmè . . . Mbanganyi bàkaadiku bumvwè mèmè mmanyisha cyòci aci ne, mafutu ònsò, ndi ngèza kupicila ku Branham Tabernacle? Elàayi ànu byanza byènù muulu, bònsò . . . Bushùwà’s, nwènù bònsò. Kì cyònsò cidiku.

⁹ Nènku pààjikà disangisha, nwênù baswè, ndi ne dīyī dikesè kuntwaku, mu mūshindū wà ne nwênù, bu nwênù mwà kwelapù cyâlà panwikalà nwenda nupâtuka apu. Mwanèètù Roy Roberson neikalè naaci kuntwaku.

¹⁰ Bwalu, netùjuulè bulongolodi bukwàbò bwà mfrangà, cintu cimwècimwè aci, ànu . . .kàdi bukwàbò bulongolodi bwà mfrangà, bwà mfrangà yònsò ne bikwàbò, yidibo bàsangisha mu masangisha ayi, bwà kabiiikadi báyifucishila bitàdi to, neyīikalè . . .bàdi báyèèla, bu pa ciibidilu, ku Banque Nationale de l'Union, bwà kucyènza tupicila ku tabernacle, pamutù pàà kwikala ne—ne bulong- . . .bukwàbò bulongolodi bwà mfrangà. Bwalu, eci cikaadi bulongolodi, mu dīnà dyà Branham Tabernacle, nudi numòna's. Nènku kùdi Branham *apa*, kùdi Branham *kwàka*, mūshindū ewu, nènku malongolodi mashiilàngàne abi kabyèna byènda bīmpè menemene to.

¹¹ Mwanèètù Roberson neàtangilè bwalu abu, nwênù bàdi baswè abu, patùdi twenda tupâtuka apu. Netùcyānyishè.

¹² Mpindyewu, mu dīndà emu, kumpalà kwà twètù kubwela mu disangisha, ndi njinga kwamba, bu Mukalenge mwà kwanyisha ne, nēnditācishè bwà kwalukila cyākàbīdi dilòòlò edi. Ndi ngumvwa bibi bwà kunyènga Mwanèètù Neville masangisha ònsò àbīdi aa, kàdi yēyè ngudi mundòmbe ne kalolo kònsò bwà ngàakulèku cyākàbīdi dilòòlò edi. Nènku bu Mukalenge mwà kwanyisha, ndi muswè kwakula dilòòlò edi pa cyena-bwalu cyà butangadiki, cyà ne: *Ewu Nganyi?* Nwamònu anyi? *Ewu Nganyi?*

¹³ Pa nàнку mu dīndà emu, ndi muswè. . .mvwa ngeela meeji bwà—bwà kwakula mu dīndà emu pa cyena-bwalu cyà Ditùkù Dyà Baamaamù. Ne ndi mumanyè ne mu mapingaja emu ne dīndà byònsò mbyūle ne ndongamu yà Ditùkù dyà Baamaamù. Pa nàнку mēmè kwela meeji ne ndi mufwānyine mu mūshindū kampànda kusangishakù cintu kampànda, bwalu tudi baswè kusambidila babèèdi dyākāmwè pàdi ànu disangisha edi dijika, bu pa ciibidilu.

¹⁴ Tudi twitabuuja ne Nzambì m'Mwondopi, ne Yēyè ùdi wòndopa babèèdi ne beena ntātu. Ne mēmè ndi mumanyè ne Yēyè ùtu wènza nàнку. Ne ncyà kaciyi mpatà nànsha yà—yà kànà to, cyòci aci, bwalu kùdi mājāadiki būngi cyanāàna mambātàngàne, mu mūshindū wà ne tudi bamanyè aci.

¹⁵ Makèèlèlè awu mvwa ntàngila mu mufuku kampànda wùvwà Mwanèètù Gene ne Leo balamè, wà mājāadiki àvwābo bangūlūle. Ne cīvwa mmufuku munène mūle tētè ne mājāadiki a àkèmeshā a bishimà, a dyondopa àdi Mukalenge mwenzèle bantu.

¹⁶ Ki mēmè kudyāmbidila ne, byòbi bifwānyine kwikala nàнку, kàdi bu twètù bafūnde byònsò bīkaadi byenzèkènzèke ebi? Ngeela meeji ne, ànu mu Puerto Rico ne mu Jamaïque,

nkààyaamù, mmufwànyine kwikala mwenzèke binunu dikùmi, anyi bipite apu, byà majaaniki a àkèmesha, a dyondopa dyà Mukalenge, a bìdiYe mwenzè.

Mpindyewu kumpàlà kwà twètù kubaalula Mukàndà, twànjàayi kwakula ne Mwenawù.

¹⁷ Mukalenge, tudi ne kusàkidila kwàbùngi kŪdì, mbwena kwamba ne, patùdì twinyika mitù yètù apa, tudi ànu tukukumina cyanàànà tukèba mēyì a kwamba; bwalu ncyēna ngiitabuujà ne bìdikù mu mishikù yà buntu to bwà kujikula njyà yà mwoyi wà mulùme anyi wà mukàji, wà mwànà wà balùme anyi wà bakàji, bàkaadiku ànu babwelè mu dipetangana Neebè. Bwà kujikula dikuukwila dyètù, dyà mutùdì tuKukuukwila, ne mushinga wŪdì naawù kutùdì. Ncitùtápùlùle ne mpèkaatù, ne citùtápùlùle ne maalu a pa buloba. Ne cidi citùpèèsha cintu kampàndà cidi cyà Cyendèlèlè ne cyà cibènèshìibwe. Nènku katwèna mwà kupeta myakù bùngi bukùmbàne to.

¹⁸ Bu mwàkambàbo musangu kampàndà kùdì muntu munène kampànda wa luumù, kùkaadi ndambù wa mbingu, mu mùshindù wà ne ùvwa mwà kwakula bipeepèle myakulu mitwè ku citèemà mishìilàngàne, mu mudimu wèndè wà mufidi wa mibelu wa Mfùmù wetù wa ditungà mulenga ewu, Dwight Eisenhower. Kàdi nànsha mùvwàye mwà kwakula, bipeepèle myakulu citèemà cijimà amu, kwambayè ne, pàakapètaye Nyumà Mwimpè, wàkatèeta yònsò citeema ayi, kàdi kakùvwakù mēyì àvwàye mwà kupeta to, cintu nànsha cimwè cìvwàye mufwànyine kujikula, ki Wèwè kumupèèsha mwakulu mupyamùpyà bwà kujikula ne kuKwela naawù twasàkidila. Ne tudi tudyùmvwa mùshindù awu, twètù pèètù, Mukalenge, ne, pìikalà mwoyi mujikè, pàmwàpa netwàkulè mu mwakulu mushìilàngàne ànu menemene, bwà twamònakù mwà kujikùla bitùdì twela meeji bwèbè Wèwè.

¹⁹ Mpindyewu tudi baswè kulòmba, Mukalenge, bwà Ùbeneshèku tabernacle ewu, mpaasàtà wèndè, balubuludi bèndè, balami bèndè, bakwàcishi bèndè bònsò, bantu bàdì bàlwa kutwèndela kaaba aka, bàbwela bàpàtuka mu biibi ebi. Swàku bwà àsanganyibwè misangu yònsò ànu ne mmwaba mulàmbula, wà diikisha ne dikùbiibwa, mùdì muzengèle mwà kubwela, kupàtuka mu biibi byàwù ne kupeta diikisha ne ditalala dyà musùkà wèndè, ne mùdì mubèèdì mufwànyine kubwela mu ciibi, ne kupàtuka mwondòpìibwe, bwà Bwikadi bùdì ne mwoyi kashidi bwà Nzambì wa Bukolè bwònsò Udi ùsòmbela mwinshì mwà musàkà wèndè ewu.

²⁰ Tudi baswè kulòmba, Mukalenge, bwà ne mu ndongamu ulwàlwa ewu wa . . . udi munkaci mwà kwenjiibwa mpindyewu ewu, bwà Wèwè kudìsangishakù ne kasùmbù kàà balombodi ne kudìsangisha ne bònsò. Ne pìikalàbi bìKusànkisha kwikalèku

civùlukilu cyà kacya ànu cyàngatangana cyà disambila dyàkenjiibwà mu cijibajiba cyà kale eci, ne kaabudimi kampàndà kàà bisoosà bibì aka, dǐngà ditùkù; cìdì mpindyewu cilwè kaleyì kàà bukènkè, mwaba wà ditalala ne dikùbiibwa bwà muzengèle, bwà dyandamuna dyà ku disambila adi.

²¹ Mpindyewu tǔfwilèku luse ku cintu kanà cyònsò citùdì benzè, anyì bambè, anyì beelè meeji, civwà cibèngàngàne ne diswa Dyèbè dinène; nènku vùlukàku, Mukalenge ne, kacivwa cifùmìne mu myoyi yètù to. Tudi bafwànyìne ànu kwikala bacijìkùle ku cyenzenedi cyètù anyì ku mishìkù yètù. Kàdi, ne lùkàsà lwònsò, Wèwè watǔmvwidì cyà bushùwà. Patwámònu ne tuvwa bapilè, twasù bwà kucitonda. Ne katwèna baswè kulama mu mwoyi wètù, bubì to, dǐbà adi tudi bamanyè ne Nzambì kààkwàndamuna masambila ètù to; kàdi tudi tutonda bilèmà byètù ku musangu ne ku musangu.

²² Nènku tudi baswè kulòmba, Mukalenge, bwà Ùbenèshèku, mu dindà emu, bònsò mu ditùngà dijimà, bu mùdìdì ditwa cyanga bwà ditùkù dyà civùlukilu cyà Ditùkù dyà Baamaamù edi. Kàdi swàku bwà edi kadìikadi ànu dyòdì edi ditùkù dyà—dyà baamaamù to; swàku bwà ditùkù dyònsò diikàle nànkù.

²³ Nzambì, enzàku mu dindà emu ne, baamaamù, bakàji, bàdì balalàkàne bayè kule ne Nzambì abu, bààlukilè mu bòbò, mu dindà emu, ne bàmanyèku ne mwakù ewu *maamù* wùdì wùmvwija ne, “ewu udi mulelè.” Swàku bwà yéyè wàfika ku dyumvwa ne ndelàngànyì, yà ku disangila dyèndè ne bàyèndè, mmitòlokù mikesè minsantù yìdì Nzambì mutèke mu bukùbì bwèndè. Dǐbà adi, Nzambì neàmwambwishè bujitu bwa dilama dyà bânà abu. Ne mùdì Mufùndù wàmba, ne: “Mukàji mwímpè, ne maamù, cìdiye aci, ncyàmubìikidilà bânà bèndè ne mmubènèshìibwe.”

²⁴ Éyì Mukalenge, patùdì tumòna ditùkù edi, pàdìbo bàya kule menemene ne Mifùndu, ne bènza maalù ànu bu nyama! Tudi tulòmba, Nzambì, bwà Ùtùpèèshèku ditàbuluja dyà cyena-kale dyàbàbiikilà bwà kwalukilabò ku mwaba wùvwàbo ne cyà kwikala adi.

²⁵ Mukalenge, katwèna baswè, nànsha byà munyì, kupwà mwoyi bwà kuKusàkidila bwà baamaamù balelèlè to, bwalu tudi bamanyè ne tudi ne bàà nànkù biikàle ne mwoyi leelù ewu; baamaamù balelèlè, bashùwashùwàlè. Nzambì, bàbènèshèku. Bàdì cibùcilu cinène bwètù twètù, nènku tudi tulòmba bwà Wèwè kutùngunuka ne kwikala naabò, Mukalenge, nènku swàku bwa biikalè ne nsòmbelu wa disànka ne bamòne mamuma a munda mwàbò àkwàcila Nzambì mudimu.

²⁶ Ne tudi tulòmba, Nzambì, bwà aba bàdì bavwàle cilòngò cyà rose citòòke zeezeeze mu dindà emu abu, anyì cilòngò citòòke, bwà kwamba ne mamwàbò ùkaadi muyè dyàmwàmwà dyà cyalu cyà byenzenedi eci leelù ewu; swàku, Mukalenge Nzambì,

bùikishè mu ditalala ne midimu yàbò yìbàlondè. Enzàku nàнку, Mukalenge.

27 Mpindyewu angàtáku Díyi Dyèbè, Mukalenge, wàkulèku ne cisàmba, ne ùbàpèèshèku busàmbi, bwalu ki citùdi badisangishile kaaba aka; mbwà kuumvwa Bwikadi Bwèbè, kuumvwa Díyi Dyèbè, ne kubèneshiibwa; ne kuumuka apa bwà kwikala balùmè ne bakàji, bânà bàà balùmè ne bàà bakàji batàmbe bwìmpè, kutàmbe patwàbwedi. Tudi tulòmbe nùнку mu Dìnà dyà Yesù, Mwànà wa Nzambi. Amen.

28 Mémè ntu munangè kubala kwà Díyi Dyèndè dibènèshiibwe. Nàнку mpindyewu netùbuululè, mu dindà emu, mu Mukàndà wà Kolintò wa Kumpàlà, ne netùbalè katùpà kàà nshapità wa 15, kubangila ku mvensà 1.

Kàbìdì, bânà bèètù, ndi nnwàmbila ne èvànjeeliyò wùngààkanùyiishà, unudì kàbìdì nwènù baakidìle, ne munudì nwènù biimàne awu,

kunudì kàbìdì nwènù basùngidìibwe, panwikalà nwènù balamè mu civùlukilu ne mémè ngwààkanùyiishà, amba ànu ne nwènù nwàkiitabuujà mu cijèngù.

Bwalu kumpàlà kwà byònsò ngààkanwàmbila bìndì mémè pàànyì mupetè, mwàkafwà Kilistò bwà mpèkaatù yètù bilondèshìle mifùndu;

Ne yèyè wàkajìikiibwa, ne wàkabùuka ku lufù mu ditùkù diisàtù bilondèshìle mifùndu;

29 Wèwè udi mufwànyìne kwamba ne: “Mwanèètù Branham, awu’s mmufùndù wà pabwàwù bwà diyiishà dyà Ditùkù dyà Baamaamù.” Èè, aci ncyà bushùwà. Kàdi, nudi bamanyè’s, Nzambi ùtu wa pabwèndè, ne Ùtu wènza bintu mu mùshindù wà pabwàwù.

30 Nèнку ndi ngeela meeji ne, meeji, a maamù. Ne mémè ndi nendè mu dindà emu, ku ngàsà wa Nzambi, mucìkàle ànu neetù pa buloba apa. Ne ndi ne kusàkidila bwà mààmù. Kàdi bu mùvwàbi bitùkèngela kàbìdì, ne, twikalè ne mudimu wà dyondopa, kàdi ncyì mumanýè ne nèngààlukilè cyàkàbìdì dilòlò edi to, kàdi mvwa mudýàmbìdìle ne pàmwàpa tuvwa bafwànyìne kuzòla cimfwànyì cyà mùshindù mukwàbò.

31 Maamù mmulenga wa dikèma. Nudi bamanyè’s, wa kumpàlà udi ukwakidila, mu mwoyi ewu, mmamwèbè. Muntu nànsha umwe kèna mwà kukulengakù to, bwalu wèwè wàkiimiciibwa, ne yèyè ngudi ukwambula kwìnshì kwà mwoyi wèndè. Ne yèyè ngudi wa kumpàlà wa dikumanya, ne wa kumpàlà, mu nsòmbelu emu, wa—wa dikukwàta. Dìbà adi, paùdì ulediibwa, yèyè ngudi cìmwè cyà ku byanza byà kumpàlà bìdì bikulenga ne bikukùpula binsònji ku mèsù. Yèyè ki wa kumpàlà wa kukutuuta cyanza ne kukunanga, ne kukutènda, mu nsòmbelu webè, mmamwèbè.

Mpindyewu, ndi ngeela meeji ne kakwènaku buneemè búngi bukumbàne butùdi mwà kupà maamù to.

³² Maamù ngudi wa kumpàla wa kwikala pàmwè ne mwànà, ne yèyè ngudi mwambùle bujitu bunène pa ciikalà mwànà, neciikalè bilondeshile mùdi maamù ùbanga ne mwànà awu mu kajila kiikalàye ne cyà kwendela. Maamù ngudi mwambùle bujitu abu, bwà kùdi Nzambi, bwà kutèeka mwànà awu mu njila mujaalàme. Nènku ndi ngeela meeji ne ki bwà cinyi baamaamù bàtu ne kaadilenga kakesè kàa pabwàkù.

³³ Ndikù mumanyè mwabilaayi kampànda mu cimenga emu. Ngeela meeji ne mamwëndè ùdi kaaba aka mpindyewu. Ùdi wàmba kwikala wa bukolè bwànyi ebu. Kàdi ncyèna ngamba bwalu ebu bwà kutàpa maamù awu ku mwoyi to; bwalu yèyè ùkaadi mupetèpète mpùtà yàbúngi, ànu mùdi baamaamù bônso bayipetèpète amu. Kàdi nsongàalùmè awu ùtu ùnwa maalà, ùtòkolà ne nzàbà. Ne pàdiye ùkwàcika bikolè, ùdi wàlukila kwàbò kumbèlu ùkadyèla mu bulààlù mùdi mamwëndè kàdi kushààla muupùkile mamwëndè. Pèndè's ùkaadi ne biikùlù. Kàdi kùtu cintu kampànda mu kutuuta kwà cyanza kwà maamù, cidi cyùmvwika bu ne cidi cyàngata kaaba ka—kashiilàngàne ne mùdi cintu kampànda cikwàbò kanà cyònsò eci mwà kulenga; mbwèna kwamba ne, mu nsòmbelu emu, mu ngaakwilù wa buntu.

³⁴ Nudi bamanyè's, muntu bu Mòsà, yèyè . . . Mèmè mufwànyine kutwà cintu kanà cyònsò makumbù bwà ngiikàdilù wèndè, mbwalu ùvwa ne maamù mutùma kùdi Nzambi. S'nudi bamanyè ne ùvwa nyèyè wàkasambila, Yoshèbèdà awu, ne wàkajinga bikolè mwinè mwànà awu. Nènku pàakalediibwàye, yèyè nguvwa umutènda, ne kumukòngoloja ne kumwibakila kalààlù ne kumutèeka mu nkodi, pàvwa mwoyi wèndè mukwàte ne byà luse awu wùcibuluka. Mwanèndè umwèpelè wa mu dibòko, ne yèyè nguvwa kaacintu kakesè kàa—kàa katàmbe bulenga kàvwàku pa buloba bujimà. Ne mùshindù mwinè wùtù maamù ùnanga mwànà wa mu dibòko kanà yònsò ewu's we! Kàdi pa kumòna mwànà mukèsè wa pabwèndè ewu!

³⁵ Ne pashiishe, mu mwoyi wèndè amu, ùvwa mumanyè ne mwànà awu ùvwa mulediibwe bwà kiipàcilà kampànda, ne pashiishe kumwangata ne kumutèeka mu cisòmbedi mene cyà ngandù, mu musùlù mwàmwa. Ku diitabuuja nkwàkenzàye cyòci aci, mumanyè ne Nzambi ùvwa ne bukolè bwà kumukùba; ne bwà kwamba mu cikòsò dinanga dyà maamù, ne cyenzedi cyà ngiikàdilù wa diitabuuja dyèndè. Bwalu diitabuuja kaditu diditèeka pa nsenga yà yinyungakanangana yà cìdidi mwà kumòna to; kakùyi tuseku to diitabuuja ditu dishindameena pa lubwebwe lùdi kalùyi mwà kunyungishiibwa lwà Dìyi dyà Cyèndèlèlè dyà Nzambi. “Bwalu ku diitabuuja,” mùdi Mufundù wàmba, “nkwàkenzàye cyòci eci.”

³⁶ Nènku diitabuuja dùtu mwà kwimanyina pa lubwebwe, mu mùshindù wà mavwala àtuuta ku nshindameenu aku, kàdi kutàngila buludi mumpàlà mwà lufù ne kumanya ne lwôlò nelwikalèku ànu mu katanci kakesè, kàdi diitabuuja d'idi mwà kutàngila dyàmwàmwà dyà mbù kùdi Ewu wákamba ne: “Mémè ndi dibiiikà dyà ku lufù ne Mwoyi,” ne kupanga mene ne kuumvwa mùdi mavwala àpaasalala amu.

³⁷ Ki diitabuuja dyà mùshindù awu divwà naadi mamwëndè wa Mòsà. Wàkamulongesha ne wàkamukoleshila mu nzùbu wa bukalenge wà Pàlò, ùmulongesha ne wàkalediibwa bwà kiipàcìlà kampànda, ne Yèhowàh wàkandamuna ku disambila dyèndè. Nènku, yèyè...yèyè kàvwa mufwànyine kwikala mupetè mulongeshi mutàmbe bwimpè to. Ki civwà cikwàcisha ncyaci bwà kufwimba ngiikàdilù uvwa Mòsà awu.

³⁸ Ngeela meeji ne ùvwa ng'Abraham Lincoln wákamba d'iyi bu nùnkù ne . . .

³⁹ Kàdi, mémè ncyèna nì n'Démocrate nì n'Républicain to, ndi ànu . . . Ndi mwena Kilistò. Bwalu, ngeela meeji ne luseke lùmwe kí ndufwànyineku kwamba bubì bwà lukwàbò luseke to; byònsò ndibola. Kàdi, Abraham Lincoln, ku àànyi meeji mémè, ùvwa umwe wa ku . . . ùvwa umwe wa ku Bamfùmù bàà ditungà bàà batàmbe bunène bàkaadiku États-Unis ewu mupetè; kusàkidilakù ne Washington, ne bakwàbò.

⁴⁰ Bwalu, Abraham Lincoln ùvwa ne—ne mbangilu mubi. Ùvwa mupèlè. Kàvwa ne nshindameenu nànsha umwe, bwà tulaasà tulonga, anyi—anyi cintu kampànda cyà cinène, anyi mfrangà, anyi cintu kampànda civwà cifwànyinekù kwikala cimukwàcishe, bu mùvwà naabi Washington to. Washington ùvwa licencié wa mu cilongelu citùmbùke, ne—ne ùvwa mumanye; ùvwa muntu wa meeji matwè, muntu munène, ànu kwìnè kwònsò aku. Kàdi Lincoln ùvwa mukolèle mu kazùbù kakesè kàà mici, mu buloba bunène bwà Kentucky, mu kazùbù kakesè kàà kale kakàyi keela nshàamendè panshi to, kàdi kashàale bu civùlukilu mùneemu mu Louisville mpindyewu aku. Kàdi, mwikàle muntu munène uvwayè awu, ne byàkamukèngela kuyiila mwà kufùnda, panshi pàvwàye udima, bwà kukùna matalà apu.

⁴¹ Kàdi ndi mwà kwambila bansongà eci. Nutukù bamanye ne Abraham Lincoln kacya kàvwakù ne mukànda bu wèndè mu nsòmbelu wèndè, too ne paanyimà pàà mumanè kupeta bidimu makùmi àbìdi ne cimwè, ànu Bible ne mukànda wa bafwile diitabuuja wà Fox anyi? Nwamònu's, cyùdi ubala ncidì cifwimba ngiikàdilù ùdi nendè awu. Kabyèna bikèmesha to patùdi ne musùmbà wà bantu banyùngùlùke mitù leelù ewu; tuubikàndàkànda twà kale twà maalu mafwikakaja, ne maalu a ciipanshi ne a lukutukutu, ki bidìbo bàtèeka pa bitanda byètù

byà disùmbishila bibèjibeji. Yèyè ùvwa ne Bible ne mukàndà wà Fox wà bafwile diitabuuja. Tàngilàayi nùmonè cyàkamuvwìjaci!

42 Kàdi mu biinè byònsò abi, dǐngà ditùkù yèyè kwamba díyì bu nùnkù ewu. Yèyè ne: “Bu kwòkò cintu cimpè mu mèmè, mbwà maamù wa difwàna dyà Nzambi,” wàkamukolesha bwà kukwàcilayè Mukalenge mudimu’s.

43 Nudi numòna’s, mwànà ùtu ùtèèlejila mamwëndè; dimulenga dikesè kampàndà dyà kùdi maamù awu, didi mwànà awu muswè kutèèleja. Pàdiye ùtápika ku mwoyi, ùyaaya kùdi maamù bwà kupeta busàmbi kumpàlà kwà kuyayè kùdi taatù. Bwalu, maamù nguvwa nendè kumpàlà, nudi bamanyè’s. Ne kùdi dipà kampàndà didi Nzambi ùpèèsha maamù, bwà kwikalayè mùshindù awu; ndi nswà kwamba maamù mulelèlè. Mpindyewu, mèmè ndi ngiitabuuja ne baamaamù mbàà kuneemekiiibwa ne bàà difwàna dyà Nzambi.

44 Kàdi ndi ngeela meeji ne, bu mùdi Matùkù a Baamaamù, bu mùdi edi nùnkù, ncintu cilongolola, bwà kubweja mfrangà búngì cyaanàna ku bilòngò ne bikwàbò. Kàdi bivwa bikèngela bwà ditùkù dyà baamaamù kwikaladi ditùkù dyònsò dicyacyà díiliilà edi. Kabìyi kumutùmina cisùmbù cyà bilòngò mu Ditùkù dyà Baamaamù adi to, kàdi kumunanga ne kumutàbaleela matùkù nkàmà yisàtù ne makùmi àsambòmbò ne àtaanu a muunya ne bufuku, munda mwà cidimu cijimà. Kàdi, mu bushùwà bwà bwalu, bangèndààmùshìngà bàdi bàkwàtangana bikolè mu bintu byà nùnkù, kàdi cidi—cidi—cidi cipeepeja maamù.

“Kaa, èè, Ditùkù dyà Baamaamù dyà musangu mushààle’s mvwa mumutùmine cisùmbù cyà bilòngò.”

45 Yèyè mmufwànyine kutàmba kwanyisha, bikolè menemene, wèwè musòmbèlekù ànu panshi ne muyiikilàngànekù nendè ndambù, mumufùndilekù tulongo, mumutuutèkù cyaanza pa dikaaya, mumutwèku mishikù pa ditàma, mumwambilekù mùdi mumunangè. Necìikalè ne mushinga mukolè kutàmba bilòngò byònsò byùdi mufwànyine kusùmba kwà musùmbishi wa bilòngò abi. Ncyà bushùwà’s.

46 Ngeela meeji ne mùvwa mmu Mikenji Dikùmi, yà Cecil DeMille ufwile ewu, uvwa mufùnde ne mwelè pa mukàbà wà bindidimbi wùmwe wà ku midimu myowela-byanza yà nsendemà yà pa buloba. Ne kumpàlà kwà kuleejiibwaci ku bantu, anyi kwà kucipàtulayè, Cecil DeMille wàkabìkila Oral Roberts ne Demos Shakarian, ne musùmbà wa bambi bàà Èvànjeeliyò mu Kaabujimà, ne wàkabàbweja mu studios yèndè sungasunga ne wàkaleeja mèbà anaayi a Mikenji Dikùmi, ne kubàkonkayè wabò mmwènenu pa cyòci aci. Nzambi ikishishèku musùkà wèndè wà bukitù awu!

47 Nènku pàngàakawùmònà, pàmvwà ngùbandila, kùvwa kaabwalu kakesè kàvwà kashààle misangu yònsò ànu

kandamate. Piikalàbi ne bààbúngì bàà kunùdi bààkawùmòna, cívwa ndìbà divwà mwànà wa bakàji wa Pàlò...paanyimà pàà Mòsà mumanè kusangana ne yéyè ùvwa mwena—mwena Ebèlù, nènku yéyè kwàngàta dipàngadika dyà kuya kasòmbela pàmwè ne cisàmbà cyèndè. Nènku ki mamwèndè wàwa uvwakù musangu kampànda mulenga kumòna awu musòmbè, mufwatàlâlè yònsò, ne mvyà ne minyèngù kwísù, musòmbè mu nkwasà wa mabòkò; ànu mutù maamù amu. Ki mwànà wa bakàji wa Pàlò kubwelayè. Ki yéyè ne: “Mémè ndi mwànà wa nganyi’s, twamb’eku twamb’eku?”

48 Nènku pààkatòòkeshiibwàbi ne, Yoshèbèdà ki uvwa mamwèndè mulelèlè. Mwànà wa bakàji wa Pàlò awu, ne bilaabu byèndè ne bikwabo, ne byònsò bimana kulongolola; kwambayè ne: “Kàdi, tàngilà! Yéyè ùdi mwà kwikala mwanèbèè wa balùme, kàdi,” yéyè ne, “mémè ngudi mumupèeshe mabanji ne bulenga. Wèwè uvwa mufwànyine kwikala kùyi ne cyùdi mumupèeshe to ànu biinà byà bitoci.”

49 Kàdi maamù mukùlákàji wa mvyà ku mutù awu kwambayè ne: “Kàdi mémè’s ngudi mumupè mwoyi.” Aci’s ki cidi cyènta dishiilangana. “Mémè ndi mumupè mwoyi.” Nzambi wàkamupà Mwoyi wà Cyèndèlèlèlè. Mùshindù mwine wùdi maamù mulelèlè’s, maamù!

50 Misangu mikwàbò bantu bàtu bàngambila, nangànangà misangu yàbúngì mu tùmpanyè twànyi ne, mémè ntu “nyiisha dìbà dyònsò ànu pa dibìikà dyà ku lufù.” Nènku ndi mubalè mufundu mu dindà emu, nshapitá wa 15 ku mvensà mwi4 wa Kolintò wa Kumpàla, pa dibìikà dyà ku lufù.

51 Kàdi, nudi numòna’s, mùshindù wùdìbo bóbò bàtèèka maamù leelù ewu, nkanyingù kàà bilòngò katèèka ku luseke lwà inàbànza mukùlákàji, mwikàle mukùlákàji wa kàyikù mwà kujuuka kuulu to, pàmwàpa, ne butekètè, ne mvyà ku mutù, ne minyèngù, musòmbè mu nkwasà wa mabòkò. Aci cidikù cyà bushùwà. Kàdi ndi muswè kwàngata cyena-bwalu cyànyi ne kunùzòlelakù cimfwànyi cishiilàngane cyà cidi maamù.

52 Muntu kampànda ùvwa wàmba ne: “Wèwè udi utàmba kuyiisha pa dibìikà dyà ku lufù be. Mukenji pàmwè ne wònsò’s wùdi ne cintu kampànda cyà cìtàngilà dibìikà dyà ku lufù.”

53 Mòna’s, cyà bushùwà’s. S’ki—s’ki mwaba mutàmbe bunènè wà ciikishilu wà Èvànjeeliyo. CyàkenzàYe nànsha ciikàle cinyi, bu ne Yéyè kààkabìika ku bafwè to, dìbà adi byònsò abi’s bìvwa cyanàànà. Cidi, bwànyi mémè, cijaadika ne Yéyè ùvwa Nzambi. Cidi cijaadika dìyì dyònsò dyàkambàYe; dibìikà dyà ku lufù! Ne cidi kàbìdi mwaba wà ciikishilu wà musùukà. Ki mwaba wà mbangilu. Ki dyoya dyà busàmbe bwètù.

54 Nènku patùdi twètù tumòna ne Yéyè wàkabìika ku bafwè, cidi citùshikika, ne byà mvità byà Èvànjeeliyò, ku mwalu wà

mvità, bwà kwangata kaaba, bwà kulwangana mvità. Bwalu, tudi bamanyè ne Yèyè mmwambè ne: “Ewu wajimija mwoyi wèndè bwà bwalu Bwànyì neàwùpetè cyàkàbìdì.”

⁵⁵ Nènku mèmè ndi ngeela meeji ne ki dyashiibwa dinènè dyà cifulu dyà Èvànjeeliyò mu Kaabujimà, dibìikà dyà ku lufù adi, ne milayi yàdi yà Nzambì, ne busàmbì bùdìdì difila kùdì aba bàdì bàdyèyemenà. Bwalu, dìdì dilaya disangila dinènè dyà didisanga dyètù cyàkàbìdì. Dìdì dilaya, ne di—dijimina dyà mpèkaatù yònsò. Dìdì dilaya dijìmina dyà dikònyangajiibwa dyònsò, makènga ónsò atùdì bapetèpète mu ewu, mwàkakèngelàbi bwà twètù kupicila, mu mwoyi wà pànu ewu. Dìdì dilaya, ne dijìmina dyà byònsò abi. Dìdì dilaya ne nànsha lufù mene nelùjimijè bukolè bwàlù bwà dikwàta, ne netùjuukè mu difwànangana ne Yesù. Nènku, ku wanyì mmwènenù, dibìikà dyà ku lufù ki mulayi wà mutàmbe bunènè wà ku milayi yònsò mu bintu byà mu Mifùndu. Pòpò apu ki pàakacitwilàdì citampì.

⁵⁶ Nènku Paasàkà washàadi ewu, pàmvwà nyiisha pa bintu bitaanu byà ne:

Mu kwikala ne mwoyi, Yèyè wàkannanga; mu
kufwà, Yèyè wàkansungila;
Mu kujiikiibwa, Yèyè wàkangata mpèkaatù
yànyì e kuya kayìshìya kule;
Kàdì, mu kubiika kwà ku lufù, Yèyè
wàkambingisha cyànaàna bwà kashidi.

⁵⁷ Ki Ditùkù ndyòdì adi bwànyì mèmè, Ditùkù dinènè dyà ku matùkù's! Ne pa kumòna mushinga wikalàci naawù, bwètù twètù bònsò, mu dibìikà dyà ku lufù, patùdì tutàta ne midimu mikolè ne bindile Ditùkù dibènèshìibwe dyà ku matùkù adi apa!

⁵⁸ Dìdì ditùpèesha mulayi wà ne dīngà ditùkù baamaamù bakùlākājì, bàdì bènda bàteketa, bàà butekète, bàà mvyà ku mitù, bacibùlùke aba nebàshintuludiibwè. Kì ng'ànù ne maamù neikalè musòmbe mwaba awu, nkàâyendè to, kàdì nnè dikù dyèndè dijimà pàmwè nendè.

⁵⁹ Nènku nditùkù kaayi diikalàci's wè! Ncikondo kaayi ciikalàci, pàtwatàngilà pa mpalà yà aba batùvwà banangè bilenga byà dikèma abu's wè! Dishìilangana kaayi mu dyòdì dinda adi, patwàmònà bananga bèètù, ne—ne kubandila ciikalàbo dībà adi's wè! Ntātù yònsò neyùmushiibwè. Bimanyinu byònsò byà lutātù nebyùmushiibwè. Kakwàkwikala kàbìdì byà matàmà matòokolojā kùdì lufù to. Kakwàkwikala kàbìdì binsònjì bìpātuka mu mèsù to. Dibìikà dyà ku lufù dìdì dilaya byònsò ebi. Kakwàkwikala kabidì madilu to. Kakwàkwikala kàbìdì dituuta dyà mwànà wa pambidi tuumapi ku ditàmà to, udi mushàale bu dibwe awu; udi mulongolodi wa bitàlù mumanè kwela manga a dibènga-kubola, ne mwelè lupeepèlè ne mulaabè mùkubù, ne bikwàbò, bwà kumwèkabì bu ne mbya mu bufùki. Katwàkwikala kàbìdì naabì dijinga to, kwòkò aku.

⁶⁰ Nènku ndi ngeela meeji patwàbàmòna biimàne kuntwaku, bananga bèètù abu, baamamwètù, beena cifuku cyètù, balundà bèètù bônso; ne kubàmòna mu mibidi yàbò yìdi kayiyi yifwa ayi, mibidi yàbò yà mu dyulu ayi; tubandila ngiikàdìlù wabò, tumòna mwikalàbo bàditwàla ne kalolo kààbò ne ditùùjà dyàbò adi, kakùciyi kàbìdì dibìnduluka anyi maalu matondè to. Pa kubàmòna dībà adi biimàne mu difwànangana ne Mukalenge Yesù, s'neciikalè ditùkù dilenga dyà dikèma.

⁶¹ Ne yònsò wa kutùdì, mu meeji ètù, myoyi yètù yìzùka ne yìjinga dībà dyà busàmbi adi, patwàtwilanganà naabò apu. Muntu ne muntu ùdì wèla meeji ku munanga wendè, pàmwàpa mamwèndè ukàadi mufwè awu. Kàdi nditùkù kaayi diikalàci, pawàmumòna cyàkàbìdì's wè! Ne kùdì papa, ne kùdì mwanètù, ne kùdì . . . bananga bônso abu, nditùkù kaayipu's wè!

⁶² Ndi pàànyì ngeela meeji, mpindyewu mene. Ndi ngeela meeji ku fàmiyè wanyì, musinga wikalàci naawù mu Ditùkù adi.

⁶³ Ndi ngeela meeji ne, mu dindà dyà dibìikà dyà ku lufù adi, pàmwàpa wa kumpalà wàlwa kutwilangana naanyì neikalè Sharon wanyì mutekète awu. To, yèyè kààkwikalakù ùzakala to. Démon awu kèna mwà kubwela mu awu mwaba to. Nshingù wa kabaala nànsha wa kànà kènàku mwà kulenga Buloba abu to. Kààkunkùpakù cyaanza cyà dindaya naaci to. Mésù makesè a bleu awu, neikalè àja maja pòòlolàye mabòkò wèla lubilà lukolè ne: "Papa!" Nèngiikalè ne disànkà dyà kumumòna, pa kumanya ne byònsò mbijikè, ki bwà cinyì ndi nyiisha dibìikà dyà ku lufù bikolè nùnkù.

⁶⁴ Pashìishe nèmmonè mamwèndè, mamwèndè wa Billy, mwanàanyì wa balùme ewu. Ne ndi ne bivùlukilu búngì cyanààna kwòkò aku mene bicidì bishààle mu mèmè emu. Ndi muvùlùke pàmwà nya nendè; anyì Mukalenge Combs, mwab'ewu, ùya nendè bwà lwendu lwèndè lwà ndekeelu, ne mèmè mvwa ngenda mmulonda, mu kàshinyì. Patùvwà twenda tupweka ne Mùsèsù wa Mwandamutekète apu, mwómò amu mene; Billy, ùvwa ne ngondo dikùmi ne mwandamukùlù.

⁶⁵ Mùvwàbo bàpàtuka bàya nendè mu mùsèsù, ne bàshìya mamwèndè ùmutàngila. Nènku ùvwa ùshàala mulàadile panshì ùdila mwadi, ne ùtàngila mwanèndè wa mu dibòko awu, kàdi kàyi mwà kuseemena pabwìpì nendè to.

⁶⁶ Ki pashìishe mu dipweka ne njila amu, mulongolodi wa bitàlù kulwa e kupweka ne—ne Mùsèsù wà—wà Mwandamutekète awu. Maman ewu nguvwa umutàngila mu cyòci cikondo aci. Nènku mwànà ùvwa mwimàne pambèlu mu bulà, muvwàle kaamùpanù kakesè menemene kípì, ne kafulu kakesè kakùnze kasendemija pa luseke ku mutù aku. Nènku pàvwà maamù awu, mulàadika pa kalàalù kàà dibùnya aku, mu ndekeelu mwà màshinyì a cyambula-babèèdì aci amu, muntàngile, pàakamònyaye mwanèndè wa mu dibòko awu

mwimàne mu bulà, bu mùvwàye mumanyè ne ki lwendu lwèndè lwà ndekeelu lùvwàye wènzà, wàkajuuka pa kalààlù aku ne wàkeela lubilà lukolè, ne wàkakùpa cyanza cyèndè cikaavwà cishààle ànu mifùbà aci, bwà kuupukila mwanèndè awu mu bulà amu. Kàdi kàvwa mwà kumwangata to.

⁶⁷ Kaa, neciikalè disànkà dyà kumumòna mu ditùkù adi. To, kààkwikala ne byanza bishààle mifùbà, anyi ne matàma mondòke to. Kàdi neimanè mu bulenga bwà mu Dyulu bwà mukalenge-mukàji wa mu Dyulu, ne bwà maamù. Mèsù èndè mafiike awu, mafiike bu a mapwapwà a nyunyi wa cikòlokò, miikàle àja ne disànka. Kààkwikala mukòbame yònsò to; bwalu, démon wa disaamà dyà cyàdi awu kààdyakubwelakù mu Buloba abu nànsha. Kàdi, kàyi ùfwa, yèyè neimanè mu difwàngana Nèndè.

⁶⁸ Ndi ncinka ne, pashiishe, wàlwa mulondèle bwà kutwilangana naanyi neikalè Edward, utùvwà tubiikila ne “Humpy” awu, dìnà dyà cikòsò. Yèyè nguvwa wa kumpàla wa ku mùyòòlolò munènè wà manungu citèemà, mùyòòlolò wà dīkù dyà ba-Branham awu. Yèyè nguvwa dinungu dyà kumpàlā dyà kukòseka; divwà dindondèle mèmè. Nèmmònè Edward ùlwa lubilu kùndi. Nànsha mwàkafwàye nsongààlùmè, ne bidimu dikùmi ne citèemà, amu. Kàdi pàngiikalā mumukwàte ku cyanza, ndi mutwishiiibwe ne netwikalè ne maalu àbùngi be a dyambilangana, a ku bwànà, bwalu tuvwa baanyànà. Tuvwa balamàkàne. Ùvwa ùnshiila mvwàla nkooci wèndè, ne—ne—ne bikwàbò, mùvwà bānà bàà muntu balelèlā bènza amu. Neciikalè disànkà bwà kumumònakù cyàkàbidi.

⁶⁹ Nènku nèmmuumvwèku wàmba cintu kampàndà cyà mùshindù ewu ne: “Uvwa mupetè mukenji wànyì anyi, Bill? Uvwa wènzà mudimu mu ferme wa ngombe, mu cikondo cyànyì cyà dishiyangana ne buloba aci. Kàdi mu lùpitaadi, mèmè kutùma mukenji ne: ‘Ambilaayi Bill ne maalu ònsò àdi bīmpè.’”

Nèngiikalè ne disànkà dyà kwamba ne: “Èyo, mvwa mupetè mukenji wèbè, mu mpàtà mwàmwa.”

⁷⁰ Pashiishe, ndi ncinka ne, wàlonda wàlwa neikalè papa wanyì. Yèyè ki uvwa dinungu dyàkalondà bwà kuya, ne . . . To.

⁷¹ Ngeela meeji ne Charles nguvwa dinungu dyàkalondà, mwakunyaanyi wa balùme awu. Wàkapetakana ne njiwù yà màshinyi pàcivwàye ànu mwànà mutekète. Ùvwa wènda ùkòka mukòlò wèndè wà dyàbalùme, pàvwàye wènda. Kàdi, nudi bamanyè’s, pàngààmumòna, kààkwikala ùkòka mukòlò wèndè awu to. Byònsò nebiikalè bijikè, neimanè mu bulenga bwà bunsongààlùmè.

⁷² Nènku neàngambilè, cintu cyà mùshindù ewu, mwikàle ùfùkisha mimwemwe. Neàmbe ne: “Èyowà, Bill, kakwèna njiwù mwab’ewu to. Ne ndi mvùluka dilòòlò divwà didyànjiile

dímvwà mupetêke ne njiwù yà màshinyi ayi ne, wêwè uvwa wakula naanyi, mwimànyine mu mushikù wà mbèlù wà kazùbù kèètù kakesè kàà didipwekesha aku,” ne mêmè ndi mutàngile musàkà wàkù, mpindyewu mene. “Wêwè kwakula naanyi bwà Mukalenge, ànu mēbà makesè cyanàànà kumpàlà kwà mêmè kuya. Ne uvwa mu cyambilu munkaci mwà kuyiisha pângààkuumukà.”

⁷³ Pashiishe papa ngwâlwa. Kaa, s’ndi mwà kumumòna’s. Nànsha mùvwàye ùntuuta ùnzegeja amu, ki cìvwà cìnkèngelà menemene, kàdi nēmmonè cikùtù cyà nsukì mifìkè myenzè mabùùlamabùùlà ayi, yibàlakana mùshindù wà kacya, mu diine ditùkù adi. Nènku yèyè neàntàngilè, ne neàmbe ne: “Mwanàanyi, udi mumanyè’s, Papa kàadyakujuuka kàbidì ku mèèsà eku, mwikàle ne nzala to, bwà kushilà bânà bèndè bàdya, bwalu’s apa tudi naabi bùngì cyanàànà. Kakwènakù lukèngelu lwà bintu apa to.”

⁷⁴ Kumumòna pàvwàye wènza mudimu, ciinè aci bwà tuumeeyà makùmi àtaanu anyi makùmi mwandamutekètè ne tùtaanu ku ditùkù, ne pashiishe kujuuka ku mèèsà bwà bânà kudyaòo, wàlukila cyàkàbidì ku mudimu. Byà bwalu ùvwa ùkwàta mudimu mukolè mu mùshindù wà ne mutèèlù wèndè wùvwa wùmulamata pa mwongo ne mabuba a muunyà, ne mààmù ùwùkòsa ne lùshoolè.

⁷⁵ Nēmumvwè wamba cintu kampàndà cyà mùshindù ewu ne: “Bill, udi muvùlùke dilòlò dinwàkalwà wêwè ne Mwanèètù George bwà kunsambidila pàmvwà ngenda nya adi anyi? Udi mumanyè’s, ngàkambila maman ne kùvwa Banjèlò bàbidì batòòkè biimàne ku bulààlù aku, ne mwanjèlo mukunze kwinshi kwà bulààlù. Nènku mwanjèlo mukunze awu ùvwa ùteeta bwà kungangata, kàdi Mwanjèlo mutòòke kwimanayè pankaci apu. Ndekeelu wa byònsò bóbò kuyabò naanyi Kumbèlu.”

⁷⁶ Pashiishe, kàbidì, wàkalòndela mu dinungu bwà kuya, anyi wàkaya, Howard ngwâlwa. Nēmmonè Howard; mutùvwà twenda bu baanyànà mu ditungà dijimà, myaba yònsò; mubiikidiibwe bwà kwikala mwambi; ne buumuntù bulenga be, kàdi baanyàanèndè mbàvwà bàmupangisha. Muiyiki wà ndekeelu wùngààkenzàku nendè, yèyè wàkamba ne: “Pângààyà, Bill . . .”

⁷⁷ Mêmè—mêmè kumumòna ùya, mu cìkèènà—kumòna, bidimu bu bìnaayi nàнку kumpàlà kwà kufwàye. Mêmè kumwambila ne mvwa mumòne Papa ùtèeka cimanyinu pa lukitá lwèndè wamba ne yèyè nguvwa ulondà.

⁷⁸ Ki yèyè ne: “Kùdi cintu cìmwèpelè cìndi njinga bwà ùngenzèlèku.” Yèyè ne: “Mêmè ntu musopàkàne mu nsòmbelu wanyi. Ntu musèlàngàne ne bikwàbò byònsò. Ncyèna—ncyèna mumanyè cidi cyenzèke to.”

Mêmè ne: “Udi muMwitàbùùje anyi, Howard?”

⁷⁹ Yèyè ne: “Ne byònsò bidì munda mwànyì, ndi muMwitàbùùje.” Munda mwà matùkù àbìdì anyi àsàtù kumpàlà kwà kuyayè, wakadishiya wu ditalala ne Nzambi, ne Mwanèètù Neville ne bakwàbò abu kuntwaku. Ki kwambayè ne: “Kùdi cintu cìmwèpelè cìndì njinga bwà ùngenzèlèku. Pàngààyà, Bill, ùbàmbilè bàngimbilèku ne: *Yèyè Neùmvwè, Nè Neǎmbè Nè: “Udi Mwenzè Bìmpè.”*”

⁸⁰ Ngeela meeji ne, kumpàlà kwà mêmè kulabula Howard ku cyanza, nèmumuvmwè wimana ùntàngila, wamba ne: “Bill, Yèyè’s wàkumvwa.”

⁸¹ Paanyimà pàà aci, nekùlwe Mwanèètù Seward, Mwanèètù Frank Broy, Mwanèètù George DeArk. Kaa, dibìikà dyà ku lufù’s didi ne mushinga wàbùngì be bwànyì mêmè. Ndi ne mwoyi wùzùkila díbà dyà butùmbi dyà dyoya adi. Ne pààbangà Bukénkè kutangalaka: “Netùmanyè mutùdì bamanyìibwe.” Netùmvwè, ne—ne netùvulukè batùvwà bamanyàngàne naabò ne—ne aba bàvwàku abu.

⁸² Ne—ne bààbùngì, nekùlwe bààbùngì kuntwaku batùvwà katùyi nànsha twelela meeji ne bàvwa mwà kwikalaku to. Bwalu, nudi bamanyè’s, pa díbà adi, mpàndì ngiitabuujà ne “dyàmpà ditùdì biimànshimànshè mu bantu, bu pa màyi mavwandùlùke adi, nedìtwàlùkìdìlè mu Ditùkù adi.” Patwàmònà bipeta byà bujaadiki bwètù, pa bantu batùvwà katùyikù tuumvwa cyenzi cyàbò kùdìCi, pàmwàpa nebìikalèmu. Ditùkù kaayi dìikalàci’s wè!

⁸³ Ne pashiishe, kàbìdì, mamiinu atùvwà bakùnekùne, katùyikù nànsha beelè meeji cìvwàwu mafwànyine kwenza to, kàdì’s ki òwò aa. Mmakwàme mamuma a mushinga mukolè, ne netuàmònè mu Ditùkù adi, bananga bèètù ne bilongo byà mutù mukolè abi.

⁸⁴ Ne ndi ngeela meeji ku binunu bínkaadi mumòne bikùdìmùne mucimà, èyòwà’s, too ne mu miliyò mpindyewu, byènda bìya, ne cìvwà mudimu wàbò wà bwambi. Kaa, nebikengelè kutàmba ne dibìishiibwa dyà ku lufù mene. Nebikengelè Cyendèlèlèlè, bwà kwendakana, kulabulanganakù ku cyanza ne kujandula bintu bìndì ncìyi mumanyè mpindyewu to.

⁸⁵ Nekùlwe baamaamù bakùlákàjì bàà mvyà ku mutù, banùdì bavwàdile bilòngò bitòòke leelù ewu abu, bàànùmònà, kàdì nebìikalè balenga bàà dikèma. Kabàyi baleejìibwe kùdì dibùngù dyà bilòngò, anyi fòtò kampànda wa muntu mukùlákàjì wa mvyà ku mutù nànsha; kàdì mu difwànanngana ne bulenga bwà dibìikà dyà ku lufù, nebìimanè mu difwànanngana ne Kilistò, mibidi yàbò yà mu Dyulu ayi, bansongà ne balenga bwà kashidi. Cyà bushùwà, ki diikisha ndyadi. Ki Ditùkù dyà baamaamù

díndi mêmè mwindile ndyôdi adi. Ki dyashiibwa dyà cifulu cyà butùmbi ndyôdi adi. Kacyi cilengejilu cyasa pa kàzakù to, kàdi dyashiibwa dyà cifulu cyà butùmbi dyà musùùkà, bwalu Nzambi mmumushintùlùle!

⁸⁶ Ndi ngeela meeji ku mààmù wanyì mêmè sungasunga, mukùlákàje ne butekète, ùzakalala ne tunèkè twà tùzakaja. Kààkwikala wenza aci mu Ditùkù adi to. Dìbà adi nebùikalè bishiilàngàne. Ne Bukènkè bunène abu bùdi bùbanga kutangalaka, patùdi tubanga kukènzakana apu, ne cijèngù cinène aci neciikalè cyènda cìdyunda ànu kudyunda. Byònsò bìdi ànu munkaci mwà kuleeja diseemena dyà Yesù. “Ne paanyimà pàà katanci,” mùdi musambu mwambè, “ne nèmmonè Yesù ku ndekeelu.”

Yèyè neikalè mungindile, Yesù, wa musàngeeleu
wà menemene ne mulelèlà.

Pa Nkwasa Wendè wa butùmbi mulenga awu
Yèyè neàngaakidilè Kumbèlu

Paanyimà pàà ditùkù edi dimanè kujika.

⁸⁷ Dìbà adi patùdi tuMumòna apu, ne katwàkwikala mutùdi mpindyewu emu to. Netù—netùmanyè mwà kutàmba kuMunanga. Katwàkushààla biimànyine kwàka ne kandambù kàà bwòwà to; bwalu, netwikalè bafwànàngàne Nendè. Èè, Yèyè neatambè kwikala cilongo cyètù kutàmba mùdiYe mpindyewu emu. Netùtambè kuMuumvwa bimpè. Bwalu, tudi kule kwà dikèma, mu mibidi yà cifwàkà; dìbà adi netwikalè ne mubidi mufwànàngàne ne mubidi Wendè wà butùmbi awu. Netùmanyè mwà kuMukuukwila. Ne patùdi tumòna cìdi Bwikadi bwà buuKampànda Bwèndè butwènzèle, butùshintùlùle, bakùlákàji baalùkile ku busongà, dikònyangala dyònsò dilongòlòdiibwe, kaa, s’netùmvwè dìbà adi bwà cinyi bukòlè Bwèndè mbutwòndòpe.

⁸⁸ Nkonko yìdi mu meeji ètù yà ne: “Yèyè ùdi mwà kucyèenza bishi? *Cikampànda* ncifwànyine kwenzeka bishi?” Nànsha nànkù, mu mùshindù wà kawùyi wùmvwika to, nebìjiminè byònsò. Majità àdi maswika paanyimà pàà meeji ètù ne: “Neciikalè cikampànda anyi? Ncifwànyine kwikala munyi?” Mu mùshindù kampànda, anyi kansanga, minu yà yikèmesha ayi neyìikalè ànu mwà kusùulula, kukùtululula majità awu, ne byònsò abi nebìjiminanganè mu cifulu cyà butùmbi cìmwèpelè cinène cyà dinanga.

⁸⁹ Dìbà adi netùMumònè. Dìbà adi netwikalè bafwànàngàne Nendè. Dìbà adi netùMukuukwilè. Dìbà adi netùmonè maamù mùdi Nzambi muswè bwà kwikalayè amu.

Maamù kí mmufwànyine kwikala mukùmbànàngàne Mwómò amu kàyi ne dikù dyèndè to.

⁹⁰ Bwalu, cikondo cyà citàmbe bunènè cyà ku matùkù èndè ònsò a mwoyi ncyà kumòna bàna banyùngulùkile mèèsà, ne

bwônsò bwàbò biikàlè ne mubidi tumatuma ne disànka; ne—ne—ne kumumòna ùpòngolola kàfé, anyi cyònsò cìdiye wènza aci, ne ùlongolola didyà dyà dilòlò, ne yèyè ne papa bàsòmba. Mòna's, aci's ki cikondo cyà citàmbe kwikala cyà disànka mu nsòmbelu wa maman, pa kumòna bânà bèndè bònsò kumbèlu.

⁹¹ Mpindyewu, kanùpangiki to, kanùpangikikù Ditùkù adi to. Enzàayi bwà munyòlòlò munènè wà dîkù dyènù awu wùswikakanè, dinungu ne dinungu dyònsò. Enzàayi bwà lusambu ne lusambu lwònsò lwikalè mu njântà. Dîbà adi patwàsòmbà pàmwè ne mèkù ètù ne tusùmbù twètù, dyàmwàmwà dyà bìpòyì byà Cyendèlèlè, Ditùkù kaayi dîikalàci's wè! Dîbà adi netùmvwè.

⁹² Yèyè ngwàkalaya cyòci eci, mu Bwàkabuulwibwà 1, mwaba wùdiYe mwambè, ne: “Mwelè wà mvità musàkisha nseke yibìdi wùvwa wùpàtuka mukana Mwèndè.” “Ûvwa ùbìikidiibwa ne Dîyì dyà Nzambì.” Ne kùvwa nku mishikù yimwèyimwè ayi, yàkambà ne: “Ndi Ewu udi ne mwoyi, uvwa mufwè; ne Ndi ne mwoyi bwà kashidi ne kashidi.” Ku mishikù yimwèyimwè ayi, mu Yone Munsantu 6, makùmi àsàtù ne. . . ùdi wàmba nùnkù, ne: “Ncyàkujimjakù cintu nànsha cimwè to, kàdi nèncijuulè cyàkàbìdi ku matùkù a ndekeelu.” Ûvwa n'Yèyè wàkenza mulayi awu; mishikù yimwèyimwè yà mushinga mukolè ayi. N'Yèyè Udi utùsùngila, Udi utwòndopa, Udi mutùpikùle, ne Wàtùbìisha ku lufù ku ditùkù dyà ndekeelu.

⁹³ Piikalàbi ne wèwè ki dinungu dikesè ditekètè didi ditàpùlùle nsangilu wa dîkù dinène edi mu Ditùkù adi, Nzambì wa mu Dyulu awu, mu dindà emu, mu mùshindù kampàndà wà kawùyì wùmvwika to, àkutululèku tuumajità tukesè tùdi tùswika mu meeji èbè atu, ne àkubuulwilèku dinanga didiYe naadi bwèbè wèwè, ne wèwè ùlwekù ne kalolo kònsò bwà kuMukwàcila mudimu.

Patùdi twelangana meeji ku bintu ebi apa, tùsambilàayi.

⁹⁴ Kumpàla kwà twètù kusambila, ne panùdi ne mitù yènù miinyika apu, nèngiikalè mwà kunùkònkakù. Nudikù baswè, mu Ditùkù dyà Baamaamù edi, kulàmbula cyàkàbìdi nsòmbelu yènù kùdiYe, bindile ne nujinga dibìikà dyà ku lufù adi anyi? Nudikù mwà kwela byanzà byènù muulu kùdiYe anyi? Pàdi muntu ne muntu. . . Nzambì ànùbènèshè.

⁹⁵ Nkufwànyinekù kwikala ngènzàmpèkààtù kampànda udipù mpindyewu, mufwànyinekù kwamba ne: “Éyì Nzambì, kacya ncitukù mwanji kudìpàyika mu dinungu adi to. Mémè ki dinungu didi dipangike didi difwànyine kupanga kwikalakù pàabàngà mààmù kukèba eku ne eku mu Butùmbi mwònsò amu. Mémè ncyàkwikalakù to, bwalu kacya ncitukù mwanji kukèba ditalala ne Nzambì to. Ncyèna ne ditèkemena dyà Mwoyi wà Cyendèlèlè munda mwànyì to. Kàdi leelù ewu ndi—ndi muswè kwenza nànkù”? Udikù mwà kwela cyanza muulu anyi,

bwà kwamba ne: “Nsambidilèku, Mwanèètu Branham, pa dîba edi. Ndi muswè bwà ùmvùlùkèku mu disambila, bwalu ndi ne bananga dyàmwàmwà dyà mbû, mbû wa Mwoyi awu, ne ndi muswè kutwilangana naabò”? Elàayi byanza byènù muulu.

⁹⁶ Anyi muntu kampànda udi mutwè cìmpìngà, ne muswè bwà kwalukila mu ditùkù edi, bwà kwamba ne: “Mukalenge, nyewù ndilàmbula cyàkàbìdì Kùdì; ndi ndwa bwà kwenzulula cipungidi cyànyì Neebè,” nudikù baswè kwela byanza byènù muulu anyi?

⁹⁷ Taatù wetù wa mu Dyulu, pàdì ditùkù edi dyènda didikòka apa, dyòdì neditùseemèjè ne ditùkù òmwè ne bwalu bunènè bwikalà mwà kwenzeka abu. Ne twètù nyewù tudi benzèjìibwe ku bukolè, cidimu ne cidimu cyònsò eci, bwà kumòna mùdì eci cileejìibwa.

⁹⁸ Kale wàwa pàvwà bantu bàya ku Yelusàlèma mu Ditùkù dyà Mpenta, ne bwà dikezudiibwa dyà ntentà wa kusambakeena ne dyà mwaba wa cijila, ne—ne bwà dilàmbula dyà mulàmbù wa mpèkaatù, ku cidimu cyònsò bàvwa bàbàvùlwija, pàvwà mwànà wa mùkòòkò awu ùfwa kuntwaku apu ne, kùvwa mwà kulwa cikondo cìvwà Mwànà wa mùkòòkò wà Nzambi mwà kufwà, bwà kwipata mpèkaatù. Musangu wònsò wùvwà kalumyànà aku kàdila, ne mashi àbasàmpukila pa byanza, cìvwa cibàvùlwija ne kùvwa mwà kwikala cikondo cìvwà Mwànà wa Mukòòkò wà Nzambi, uvwa mwà kwela lubilà ne: “Eli, lama . . . ? Eli, lama . . . ?” ku nkùrusè.

Nyewù ndòmba, Nzambi, ne patùdì twètù tutàngila leelù ewu ne tumòna ne . . .

⁹⁹ Kùkaadi ndambù wa mbingu, kumpalà kwà kuumuka mu mudimu Wèbè, bwà kuya mu Californie, mu Indiana emu mùvwa mutupù ne mufwè, ne kamùvwa mwoyi nànsha mukesè to, bwà pa kutàngila. Bilòngò bìvwà bifwè mu muvù mushààle wà mabèjì àpòpoka awu. Mabèjì àvwa mapòòpòke ku micì. Ne màyi a mu micì àvwa mayè mu miji, ne byònsò bìvwa bifwè.

¹⁰⁰ Kadi kùvwa muvù kampànda pàvwà dîbà dibangè kuteema mu mùshindù mushiilàngàne. Dîbà òmwè òmwè òvwà diteemè mu muvù mujimà wà mashika awu, kàdì bintu bìvwa bishintùlùke ne dyòdì kuteema mùshindù mushiilàngàne. Nènku ku diteema dyà dîbà adì, ne bintu abi, mwoyi kusampila, myaba yònsò. Mabeji kupingàna ku micì. Dibèjì . . . Mwoyi wùvwà muumùke mu dibèjì, ne dibèjì dimatè, kàdì mwoyi muyè bwà buloba; mmwalùkile mu bulenga bupyabùpyà, pa bulenga bwà bunsongà. Cilòngò cìvwà cilekèle mánànanshì àci—àci aci, cìvwà cilekèle bulenga bwàcì bwà disànkà dyàbùngì ne cipòne ciyè mu buloba aci; ncilediibwe, cibwayike cyàkàbìdì mu bunsongà bwàcì, ne disànkà dipyadìpyà dyàbùngì.

Cìdì cìtùvùlwija cinyì, Mukalenge, mu mèbà aa?

101 Nènku buloba mbuumùke ku cipèèlà cyà munda mutupù, cyà cidila mwadi, bulwè mpàladiizò wa bulenga, ne mbùlùbùlù ne nyuunyi yimba misambu, ne byònsò ne disànka mu mwoyi, ne micì yì—yìsàngala mu mpeepèlè yà kapeepà kàà muvù wà luuyà wà bintu bitòloka. Luuyà ne disànka bivwa cyàkàbìdi pa buloba, bifùmìna ku dìbà, d-ì-b-à.

102 Kàdi dīngà ditùkù M-w-â-n-à neâlwe ne dyondopa mu mapwâpwâ Èndè, ne myoyi yà mikesè yìdi misokoka bu mâyi a mu mucì, mu buloba ayi, bu mwo—mwoyi wùdi mu dimiinu dyà cilòngò, newùcìfikìshè cyàkàbìdi ku bupyabùpyà, kaciyikù mwà kufubidila to. Kaa, mùshindù mwinè wutùdi tuKwela twasàkidila bwà ciinè eci's wè!

103 Nènku nyewù kùvwà byanza byàbúngì be byela muulu mu dindà emu, bwalu mbamanyè ne dyàmwàmwà dyà cilàmbà cikùdika, kùdi cintu kampànda. Bàdi bàjinga kumòna maamu. Bàdi bàjinga kumòna bananga bààbò ne bamanyangana naabò, ne kujandula maalu-masokoka ònsò aa, mùdìbo bàlwa pànwapa, too ne mu bikondo byònsò. Byònsò abi bìdi bìsanganyibwa paanyimà pàà cilàmbà cikùdika cisokoka. Nènku dīngà ditùkù Wèwè neâlwe. Nènku bóbò mbeelè byanza muulu; mba—mba—mba—mbaswè kwikala batwìshìbwè, Mukalenge. Bàdi munkaci mwà kudìvwijulula bapyabàpyà, ne mèmè pàànyì. Mpindyewu tùkwàcìshèku, Mukalenge. Vwìjùlùlùku diitabuuja dyètù dipyadìpyà ne dikàndà dyètù.

104 Ne bu mutùdi tuumvwa diseemena dyà Mukalenge. Ne bidimu makùmi ànaayi byàshàadi ebi, kwàkapàtuka mpena mupyamùpyà pa buloba. Nyumà wàkabanga kusokolola maalu. Nènku's ki twètù aba ku cimanyinu cyà ndekeelu, pabwìpì menemene ne Dilwa. Tudi bamanyè ne diseemena dyà Mukalenge dikaadi pabwìpì. Ne tudi tumòna babèèdi munkaci mwà kwondopiibwa ku màsaamà àbò, civwà kaciyikù cyùmvwika to bwà bàà pa buloba, munda mwà bidimu binunu bìbìdi, kacya ku bàpostòlò. Kadi's ki cyòci eci cimwènèka cyàkàbìdi, bapròfetà bàjuuka, Banjelo bàmwènèka, bimanyinu ne maalu a kukèma. Ncinyi aci? Dibìshìibwa dyà ku lufù dìdi dyènda diseemena. M-w-â-n-à ùlwalwa.

105 Enzàku bwà twikalè badìlongòlòle, Mukalenge. Enzàku bwà twàkidilè mulayì wònsò wà Nzambi; katwèna twela meeji bwà tuumajità tùdìbo bakùngwije kùdi maalu a mamanya etu, ne bikwàbò ne, kaciyèna mwà kwenzeka to. Enzàku bwà twòtò atu tùbangè kukùtuluka, mu dindà emu, ku bàdi kabàyi bàfwa...[Katùpà kàà mukàbà wà mèyi munda mutupù—Muf.] . . . pàdiYe útùtukila ku Mèyi a Bible wa Nzambi apa, cyenzè bu cyamù cyà mudimu cijaaalamija bìmpè, bwà kwimba cyonà cyà ne: “Ndi Ewu uvwa mufwè, ne udi ne mwoyi kashidi ne kashidi.” “Katanci kakesè, bàà pa buloba kabààkuMmòna kàbìdi to; kàdi nwènù nenùMmòne.” “Bwalu

Nêngiikalè neenù, munda mwènù mene, too ne ku nshìikidilu kwà buloba.” “Ne nebyènzekè mu matùkù a ndekeelu, mùdì Nzambì wàmba, ne Mémè nêngiìcikijè Nyumà Wanyì pa musunya wònsò; bimanýinu ne maalu a kukèma; bakùlumpè nebàlootè bilòòtà, ne nsongààlùmè neyìmonè bikèènà-kumòna,” cimanyinu cyà mvùlà mushiishe ne cyà cikondo cyà nshìikidilu. Enzàku bwà cyùmvwikè munkaci mwètù, mu dindà emu, Mukalenge, ne swàku bwà diitabuuja dyètù dikubiibwè. Bwalu tudi tulòmba nùnkù mu Dîná dyà Yèsù. Amen.



DITÜKÜ DYÀ BAAMAAMÜ LUA59-0510M

(Mother's Day)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu Ditükü dyà Baamaamü, mu dyàlumingu mu dindä, mu matükü 10 a ngondo mwitänü, cidimu cyà 1959, mu Branham Tabernacle mu Jeffersonville, Indiana, U.S.A. Ndyumusha pa mukaba wa mëyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2022 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org